

# MISSION & EVANGELISM KHAWMPI

Khuga Sadar Presbytery (KSP)

16 vei tinna Thuzil khawm ding

“**KHRISTA DINGA PALAI**” 2Kor. 5:20

Amun :- HQ. Tuibuang Presbyterian Church

Ahun :- 10th March 2018 (01:00 PM)

Thuzil lakhawmtu :- Rev. Haulalven,  
Tuithanak District, Bialtu Pastor.

---

Sawlchak Paul in Pathian na a sepna, lopi leh ki-at um asak mama khat chu ***Khrista a ding ah Palai ahina*** hi a hi.

- I. “Palai” ti thumal hi vak genchian gaw phawt hitiu. Palai (Ambassador) ti thumal hi, Greek pau ah chun ‘Presbeutes’ Rom lalgam ki etkawlna kampau a hi. Rom lalgam in gam a etkawl dan panite chu Rom Lalpen(Emperor) in a awpkhum ziang (Direct control of the emperor) leh gam vaipawtu ten a awpkhum uh ti di a hi. Ei India ki etkawlna tawh tekhn in State Govt. or President Rule/Union Territory i ti gual hi hiding a hi. ‘Palai’ iti hi Rom lalpen in asik-azal ah vaihawm ding ah a ngansia te chu ‘Presbeutes’ Palai iti hi a hi. Rom lalpen(Emperor) ai-aw na ahiziakin ‘Palai’ ti hi dinmun sangtak leh za-um tak ahia, pindan ah kichengte palai ah pangual maimai hilo a hi. Palai (Presbeutes) in a bawl leh agen zosia chu Rom lalpen in a gen gual ah pawm ahisek hi. Khrista ding ah palai ti umzia chu - Khrista ding ah khut leh keng, muk leh kam, mit leh ha, ‘Khrista sep bak sem di’n, Lalpa’n kei ei guat tai’ Pastor Liankhopau in ala phuak ala ti chu a hi.
- II. Rom lalgam in ‘Palai’ ati te mawpuakna chu gam dangte le Rom lalgam leh insungkuan ah laklut guat di ti ahi kit hi. Zia gual ma chun khrista ding ah Palaite chun le khawvel ah hin nam chuamchuam te chu, Khrista gam a ding leh Khrista sungkuan ah um dingin a laklut guat ding uh a hi. Zia chu Missionary nasep hi ahipen mai hi.
- III. I taklatsa gual in PALAI ti chu Greek pau ah ‘Presbeutes’ leh latin ah ‘Legatus’ a hia, sap pau lam ah ‘Ambassador’ ahi. Khawvel ah gam chuam chuam te chun amau thasang ah pang ding in Ambassador hi a sawl un a ngansia sek ua, zia Ambassador te chun agam ai-aw bangkim gen in bangkim a sem sek ui. Ambassador te umna chule ‘Embassy’ ti a hi. Ambassador/Palaite apat chun a umna gam mite chun gam lopi leh za-um ahileh-hilo dan uh a zildawk sek ui. Lei leh Van Lalpa, Pathian bangkim bawl thei leh chungnungpen pa ding ah Palai vak hi phak chu dinmun sangpen chu Khrista zal ah ei uh dinmun le ahung hita ahi. Khawvel ah mi zosia ngaisan mama Mother Teresa chun “*Pathian in khut leh keng a nei pua’n, nangma khut leh keng kha a mangcha ut hi. Hepina mit anei pua’n, hepina mit ah mite a et theina’n nangma mit a kikawppi ut hi. Chun Pathian nangma sum leh pai, nei leh gou chu ahun kikawppi ut zing hi, A hepina nasep a sep daw theina’n; nangma aw-gi mangcha in apau daw nuam hi. A hepina thu a puanzak theina dingin*” ala ti a hi.
- IV. Britiste(Britiante) Ambassador te chu gamdang a umnau ah ‘Briton’ ati sek ui. Mi gam ah um pau chuam chuam lak ah um in, chawndan leh khankhua danglam mama leh nekdan leh dawn dan kibatlona gam ah um in khawsa maleu Britian ahinau chu a danglam theilo ahi zing hi. Zia gualma chun Khristian Khrista a ding ah Palai ei uh le khawvel ah khawsa zingin hindan leh nasepna chi chuam

chuam in sem male'u hinle vankhua leh tui (Citizen of heaven) i hiu hi. Khawvel ah khawsa maleu hin khrista ding ah Palai/Vankhua leh tui te i hiu hi. Zia chu i danglam nau chu a hi. Danglam leh chuam bik ihinau hi nal ahun tai. Danglam leh chuam ngamlo chu Khrista ding ah Palai hi zo paw khai ti'u.

V. Palai/Ambassador nasep poimaw mama kit khat a gam a sawltute thasang ah thugen leh paudaw bep hilo in, a nasepna gam ah mite dinmun zil gel ah athugen uh hoitak cha ngaithak ah gelkhawk piak le ahikit hi. A haksatna'u agen uh hoitak ah ngaithak piak leh zia haksatna chu suk navak piak guat ding chu Palai nasep ngaisan um tak chu a hi.

VI. Khrista Palai in a sep thupipen ding chu : Mite Pathian tawh kicham sak ding chu ahi. Pathian in mihingte tawh kichamna ding in a sep ding dawl chu semzo kei in a um ta, mihing te zawk hi Pathian tawh kicham ah um ding chu Palai mawpuakna lianpen chu a hi.

VII. Khrista Palai ah guat i hitheina ziak, bul kipatna chu Pathian hepina maktak mai ziak ahi. Zia Pathian hepina chu phatchuampi zaw khak ding chu khristian zosia a ding ah thil lau um pen ahidan Paul a tangkopi pen chu a hi.

### **Genkhawm dite :-**

I. Nepalite, Terbari mun ah umte kianga khrista Palai i hina ziak ua i sep i bawlte haw hi lungkim um i sau em?/hawmthaw um nalai....

II. Phatchuampi lo khak ding ah lau um chu bang ahem? Zia chu ei uh KSP dinmun ah banggual in i hia'u em?

III. I thuzil pangana (v) khrista Palai in a bawl ding chu a nasepna mun ah mite thugen leh dinmun guntak ah zil leh phatchuam ngaitak ah a thugen uh ngaithak ding ti a hi. Chuti ahi chun, tulai khristiante hi thugen i kichu ding ahem ahilo leh thu ngaithak khawizawk hi iha bawl thak ding uh a diam?

IV. Pathian tawh kichamna hi a pawimaw pen khat ah gel in Abraham Lincoln America President 16na chu Rom 5:1 changkhat tel mipi kiang ah a thugen/lecture masapen chu "I Pathian chiat uh kicham in um hitiu" ti ahi. America khantona ziak khat hi ding inle ginchak a hi zing hi.

V. Muslim/Pangalte Manipur ah umte kianga Missionary sawl ahi nailo ziak leh sawl ahi theina ding thu te khrista Palai suan umte hin gelkhawm hileh..

....xXx....